

## आकाशवाणी जयपुर—अजमेर

### प्रादेशिक समाचार

दिनांक 28.08.2025

समय: 18.45 बजे

- राजस्थान हाई कोर्ट पुलिस उप निरीक्षक भर्ती परीक्षा—2021 रद्द करण रो हुकम दीनो—आर.पी.एस.सी. रा काम करण रा तरीका माथे गंभीर सवाल उठाया।
- विधानसभा रा 1 सितम्बर ऊं शुरू व्हेवण वाळा सत्र ऊं पैली आज सगळी पार्टियां री मीटिंग व्ही—कांग्रेस शामिल नी व्ही।
- प्रदेश मांय पीएम कुसुम योजना रा तैत खेती—बाड़ी सारू बिजली रा कनेक्शन तुरत जारी करण माथे खास ध्यान दियो जावेला।
- राज्य रा घणखर हलकां मांय बिरखा रा दौर मंदो पड़यो—मौसम विभाग 30 अगस्त ऊं केर्इ ठौड़ां चोखो मेह व्हेवण रो आसार जताया।

000

राजस्थान हाई कोर्ट पुलिस उप निरीक्षक भर्ती परीक्षा 2021 रद्द करण रो हुकम दीनो है। न्यायाधीश समीर जैन री एकलपीठ ओ फैसलो सुणायो। अदालत मान्यो के ई भर्ती परीक्षा रो पेपर पूरा राज्य मांय आउट व्ह्यो अर राजस्थान लोक सेवा आयोग—आरपीएससी रा सदस्यां री भूमिका ई शंका रा घेरा मांय रही। अदालत ई साल व्हेवण वाळी एस.आई. भर्ती परीक्षा मांय साल 2021 री भर्ती परीक्षा रा 859 ओहदा ई जोड़बा रो हुकम ई दीनो। अदालत 2021 भर्ती परीक्षा रा उम्मीदवारां ने ई नुवी भर्ती मांय शामिल करण रा हुकम दीना। ई मामला मांय अर्जी देवण वाळां रा वकील हरेंद्र नील अदालत रे बाहर खबरनवीसां सागे बातचीत रे दौरान कह्यो के न्यायालय भर्ती परीक्षा रा पेपर लीक मामला मांय आरपीएससी रे ई शामिल व्हेवण री शंका माथे खुद संज्ञान लेता थकां मामलो सुनवाई सारू मुख्य न्यायाधीश सामी रैफर कीनो।

.....  
राज्य सरकार रा अतिरिक्त महाधिवक्ता विज्ञान शाह कह्यो के सरकार रो ई ओ मत हो के आगे री जांच पाछे भर्ती परीक्षा ने रद्द करी जा सके है। म्हाणा खबरनवीस बतायो के अदालत आरपीएससी रा काम करण रा तरीका माथे गंभीर सवाल उठाया।

.....  
हाई कोर्ट रा हुकम माथे विधि अर संसदीय कार्य मंत्री जोगाराम पटेल कह्यो के हुकम माथे विचार कर्यो जावेला। कृषि अर ग्रामीण विकास मंत्री किरोड़ी लाल मीणा अदालत रा फैसला रो स्वागत करता थकां कह्यो के एसआई भर्ती परीक्षा मांय करीब आधा उम्मीदवार गलत पास व्ह्या हा। राष्ट्रीय लोकतांत्रिक पार्टी रा संयोजक अर सांसद हनुमान बेनीवाल अदालत रा फैसला रा स्वागत करता थकां कह्यो के वां री पार्टी ई मामला मांय जयपुर रा शहीद स्मारक सामी चार महीना ऊं बत्ता बगत ताँई धरनो दीनो हो। मामला री जांच कर रही एसओजी रा एडीजी वी.के सिंह कह्यो के अदालत रा हुकम पाछे पेपरलीक रा बारा मांय जनता बीचे खास संदेश जावेला अर ऐडा गैर कानूनी कामां मांय शामिल व्हेवण ऊं पैली लोग सोचेला। वे कह्यो के ई मामला मांय हाल ताँई 122 आरोपितां ने गिरफ्तार करी ज्या है। वे बतायो के मामला री जांच चाल रही है अर केर्इ आरोपित हाल ई फरार है।

000

विधानसभा रा 1 सितंबर ऊं सर्लु व्हेवण वाळा सत्र ऊं पैली विधानसभा अध्यक्ष वासुदेव देवनानी सगळी सियासी पार्टीयां री मीटिंग बुलायी। हालांकि सदन मांय विपख रा नेता टीकाराम जूली इण मांय शामिल नी व्हया। मीटिंग मांय मुख्यमंत्री भजन लाल शर्मा समेत भारतीय जनता पार्टी रा नेता शामिल व्हया। मीटिंग मांय खबरनवीसां सागे बातचीत करता थकां सरकारी मुख्य सचेतक जोगेश्वर गर्ग कह्यो के स्पीकर विपख रा नेता सागे बातचीत पाछे ई मीटिंग बुलायी ही पण न तो विपख रा नेता अर ने ई वां रा मुख्य सचेतक इण मांय शामिल व्हया। वे विपख रा ई रवैया री निंदा कीनी। संसदीय कार्य मंत्री जोगाराम पटेल बतायो के विधानसभा सत्र री सगळी तैयारियां लगभग पूरी व्हे ग्यी है। वे कह्यो सत्र रे दौरान जनता रा भला ऊं जुड्या मुद्दा उठावण री सरकार अर विपख दोन्यू री है।

000

प्रधानमंत्री नरेन्द्र मोदी आज जापान अर चीन रा दो दिन रा दौरा सारु रवाना व्हेला। यात्रा रा पहला दौर मांय श्री मोदी जापान मांय व्हेवण वाळा 15 वां भारत-जापान वार्षिक शिखर सम्मेलन मांय शामिल व्हेला। श्री मोदी री जापान रा प्रधानमंत्री शिगेरु इशिबा सागे आ पहली शिखर बैठक व्हेला। ई दौरान, दोन्यू प्रधानमंत्री भारत अर जापान बीचे खास रणनीतिक अर वैश्विक साझेदारी अर क्षेत्रीय अर वैश्विक महत्त्व रा मुद्दां माथे चर्चा करेला।

000

प्रदेश मांय अब पीएम कुसुम योजना रा तैत खोली ज्या विकेन्द्रित सौर ऊर्जा संयंत्रां ऊं जुड्या 33/11 किलो वोल्ट सब स्टेशन हलकां मांय खेती-बाडी सारु प्राथमिकता रा आधार ऊं तुरत कनेक्शन जारी कर्या जा सकेला। ई सारु मुख्यमंत्री कृषि कनेक्शन नीति-2017 मांय बदलाव री मंजूरी दे दीनी है। प्रदेश रा तीन ई विद्युत वितरण निगम ई बारा मांय हुकम जारी कर दीना है। ध्यानजोग है के पीएम-कुसुम योजना रा कम्पोनेंट-ए अर कम्पोनेंट-सी मांय प्रदेश मांय तेजी ऊं काम व्हे रह्यो है। प्रदेश री गांव-ढाणियां मांय करीब 1543 मेगावाट बूता रा 776 विकेन्द्रित सौर ऊर्जा संयंत्र खोल्या जा चुक्या है।

000

पाली मांय आज वरिष्ठ नागरिक तीर्थ यात्रा योजना रा तैत ऑनलाइन लॉटरी निकाली ज्यी। अतिरिक्त जिला कलेक्टर बतायो के तीर्थ सारु चुणी ज्या 1303 बुजुर्गा मांय ऊं 1163 रेल अर 140 हवाई जहाज ऊं जावेला।

000

गणेश चौथ रा सिलसिला मांय आज जयपुर री मोती डूंगरी ऊं भगवान गणेश री शोभायात्रा निकाली जा रही है। शोभायात्रा मोती डूंगरी रोड, जौहरी बाजार, त्रिपोलिया बाजार, गणगौरी बाजार, ब्रह्मपुरी ऊं नाहरगढ रा गढ़ गणेश मंदिर पूगेला। ई दफा शोभायात्रा रा 25 स्वचालित अर 60 सजीव मूरत रूप झांकियां माथे खास ध्यान व्हेला। आं मांय गणेशजी री न्यारी-न्यारी मुद्रावां अर रूपां रो दरसाव कर्यो जावेला। शोभायात्रा रे कारण आवण-जावण री व्यवस्था मांय बदलाव करी ज्यो है। सवाईमाधोपुर रा त्रिनैत्र गणेश मिन्दर मांय भर्यो मेळो आज पूरो व्हे ग्यो। इण मांय केंद्रीय संचार ब्यूरो रा क्षेत्रीय कार्यालय री ओर ऊं आज दूजा दिन ई केंद्र सरकार कानी ऊं चलायी जा रही जनता रा भला री न्यारी-न्यारी योजनावां री जाणकारी दीरीजी। ई दौरान चित्र प्रदर्शनी, संगोष्ठी, मौखिक प्रश्नोत्तरी होड़ राख्यी ज्यी अर एक पेड़ मां के नाम अभियान रा तैत पौधा रोपी ज्या।

000

दिग्म्बर जैन समाज रो दस लक्षण पर्व आज सर्लु व्हयो। 10 दिन रा ई पर्व रा तैत रोजीना मिन्दरां मांय न्यारा-न्यारा कार्यक्रम राख्या जावेला। पर्व रा पहला दिन आज उत्तम क्षमा दिवस मनायी ज्यो। डूंगरपुर रा जिनालयां मांय आज पूरा सिरधाभाव सागे भगवान नेमीनाथ रो अभिषेक करी ज्यो। इण ऊं पैली श्वेताम्बर जैन समाज रो पर्युषण पर्व पूरो व्हेवण रे मौके आज क्षमापना कार्यक्रम राख्यी ज्या। ई मौके लोग एक-दूजा ऊं

सालभर मांय जाने—अनजाने व्ही गलतियां रा प्रायश्चित रा तौर ऊं माफी मांगी। पाली रा जैन मिन्दरां मांय खास सजावट करी ज्यी।

000

प्रदेशभर मांय आज ऋषि पंचमी मनायी जा रही है। ई मौके तळावां कने सप्त ऋषियां री पूजा—अर्चना कर र श्रावणी कर्म कर्यो जा रह्यो है। पाली रा सिरेघाट माथे महिलावां संवारे ऊं ई व्रत राख र सप्तर्षियां ने तर्पण अर्पित कर रही है अर न्यारा—न्यारा समाज री ओर ऊं हवन राख्या जा रह्या है। धौलपुर रा तीर्थराज मचकुंड धाम माथे आज कौमी एकता रो प्रतीक दो दिन रो देव छठ मेलो भर रह्यो है।

000

जम्मू—कश्मीर मांय 26 अगस्त ने ऑपरेशन रक्षक रे दौरान वीर गति हासिल करण वाळा हवलदार इकबाल अली री पार्थिव देह ने आज झुन्झुनू ज़िला मांय वां रा गांव लालपुर मांय सुपुर्द—ए—खाक कर दीरीजी। इकबाल अली 21 ग्रेनेडियर्स मांय जम्मू—कश्मीर रा कुपवाडा मांय तैनात हा। वां रा अंतिम संस्कार ऊं पैली मोटी तादाद मांय नौजवान तिरंगा रैली निकाली। इकबाल अली रा जनाजा मांय वक्फ बोर्ड रा चेयरमैन डॉ. खानू खां बुधवाली, मदरसा बोर्ड रा चेयरमैन एम.डी चोपदार, सांसद बृजेन्द्र ओला, विधायक राजेन्द्र भांबू हाकम अली, पितराम काला, भगवानाराम सैनी, जिला कलेक्टर डॉ. अरुण गर्ग, पुलिस अधीक्षक बृजेश ज्योति उपाध्याय, कांग्रेस जिलाध्यक्ष दिनेश सुंडा अर मोटी तादाद मांय गांव वाळा अर नौजवान शामिल व्हया।

000

प्रदेश रा घणखर हलकां मांय बिरखा रा दौर मंदो पड़बा ऊं थोडो आराम मिल्यो है, हालांकि अधिकांश भागां मांय हल्की ऊं मझला दर्जा री बिरखा व्हे रही है। लारला 24 घंटा मांय डूंगरपुर ज़िला रा वेजा मांय जोरदार मेह बरस्यो। बांसवाड़ा ज़िला रा कुशलगढ अर सज्जनगढ मांय मूलसलाधार बारिश व्ही। ज़िला रा केई नदी—नालां मांय पाणी उफण रह्यो है। हलका री पुलिया माथे पाणी आवण 6 घंटा तांई आवण—जावण बंद रही। ज़िला रा माही बांध अर कागदी पिकअप वियर ऊं बत्तो पाणी निकाल्यो जा रह्यो है। चूरू अर आरे—सारे रा गांवां मांय दोपहरां पाछे चोखो मेह बरस्यो। राजधानी जयपुर समेत केई ज़िलां मांय आज बादला मण्डया रह्या। कठे—कठे हल्की बिरखा अर कठे—कठे छांटा—छिड़का रा समाचार है। मौसम केंद्र जयपुर रा निदेशक राधेश्याम शर्मा कह्यो के आज अर काल हल्की ऊं मझला दर्जा री बिरखा रो दौर जारी रहवेला। वे बतायो के 30 अगस्त ऊं कुछ हलकां मांय ओजू तेज बिरखा सरू व्हेला।

000

प्रधानमंत्री जन धन योजना चलायां आज 11 साल पूरा व्हे ग्या है। आ दुनिया री मोटी माली समावेशन पहलां मांय शामिल है। प्रधानमंत्री नरेन्द्र मोदी 15 अगस्त 2014 ने लाल किला ऊं ई पहल रो ऐलाण कीनो हो। ई मौके श्री मोदी सोशल मीडिया पोस्ट रे जरिये कह्यो के जद समाज रा आखिरी छोर रा लोग माली तौर ऊं जुड जावे है तो पूरो देश एके सागे आगे बढे है अर ओ प्रधानमंत्री जन—धन योजना ऊं संभव व्हे सक्यो है। ई मौके केंद्रीय वित्त अर कॉर्पोरेट मामलात् मंत्री निर्मला सीतारमन कह्यो के प्रधानमंत्री जन धन योजना सीधा तौर ऊं फायदो पूगा र न्यारी—न्यारी योजनावां रो फायदो जनता ने देवण रो खास ज़रियो है।

000